



Bazar en claustra a Glion

Ina tradiziun che va a fin

■ (cp) Cun egls plein legria ha sora Edigna aviert dacuort il bazar claustral a Glion, ch'ha liug onn per onn, e saviu solidar ils emprems hosps. Jeu sai buca sch'igl ei curdau si als presents che sora Edigna bargeva riend. Igl ei mingacass stau da veser il proverbial egl rient e larmont. Quei bazar en claustra vegn ad esser il davos che sora Edigna ha organisau ensemen cun gidonters e gidontras da lunsch e da maneivel. D'ina vart va ei vess a sora Edigna da stuer desister, da l'autra vart seregorda ella bugen dalla biara energia che ton ella sco tuttas gidontras han impundiu onn per onn per quei bazar. Ella ha rimnau biaras lavurs zambergiadas, rauba da caltschiel, donaziuns ed artechels per decorar da Nadal.

Il recav ord la vendita da quei material, recaltgaus sin Nadal, ei ius mintg'onn en favur d'in project dalla Procura per las missiuns dallas soras dominicanas da Glion. Quest onn ei quella summa destinada per in stabiliment dalla giuventetgna, la «Casa Maria Theresia» en Brasilia. E sch'il success ei il medem sco igl onn vargau selegra il menader dalla Procura

per las missiuns, Pius Süess, da saver surdar als favorisai in schec da plirs mellis francs. Era per el eisi la davosa ga, essend ch'el va primavera en pensiu. El ei s'engaschau ils davos onns fetg pils basegns ellas missiuns ed ha fatg gronda reclama persuerter. Las soras dominicanas da Glion engrazian da cor ton a sora Edigna sco era a Pius Süess per lur engaschi sco era a tut quels ch'han visitau il bazar e fan quei aunc uonn.

Mo buc adina eisi a fin cu ei finescha. Beinduras meina finiziun era ad ina nova entschatta. Aschia selegran las dominicanas da Glion e lur Casa da sentupada ch'ins sa retrer egl avegnir rauba da caltschiel ed artechels per decorar da Nadal igl entir onn ora – e quei ella stizun dalla claustra.

Il davos bazar dalla claustra ei aunc aviarts entochen ils 12 da schaner 2020, mingadi dallas 09.00 entochen allas 17.00. Il medem mument san ins era admirar l'enconuschenta stalla da Nadal ella baselgia claustrala. Vegni sperasvi! Las dominicanas da Glion e lur collaboraturas selegran sin biars visitaders e visitadras.



Biara e fetg biala rauba da caltschiel vegn offerida dil bazar.

MAD